



Äntwert vun der Ministesch fir Gläichstellung an Diversitéit Yuriko Backes, der Justizministesch Elisabeth Margue an dem Inneminister Léon Gloden op d'parlamentaresch Fro n°1622 vum 4. Dezember 2024 vum honorabelen Deputéierten Dan Hardy

Haislech Gewalt ass leider nach ëmmer eng aldeeglech Realitéit zu Lëtzebuerg: se betrëfft all gesellschaftlech Schichten an all d'Communautéiten, déi bei eis am Land wunnen. De Public an de verschiddene Foyeren a Berodungsservicer déi Affer vun haislecher Gewalt betreien, spigelt déi multikulturell Gesellschaftsstruktur, déi mir hei am Land virfannen, erëm. Aleng am Service d'assistance pour Victimes de Violence Domestique (SAVVD) vu Femmes en Détresse sinn 2023 männlech a weiblech Affer aus iwwer 39 Nationalitéite betreit ginn.

Am Kampf géint häislech Gewalt schaffen de Ministère fir Gläichstellung an Diversitéit, de Justizministère an den Inneministère, zesumme mat e sëllege Partner um Terrain, an enger multidimensionaler an genderneutraler Approche aus Afferschutz, Täteraarbecht a Sensibiliséierungsmoosnamen. Zu Lëtzebuerg kritt all Affer vun haislecher Gewalt Hëllef an eng professionell Prise en Charge, an dat onofhängeg vu sengem Geschlecht, senger Genderidentitéit a senger sexueller Orientéierung.

Dat modifizéiert Gesetz iwwert haislech Gewalt vum 8. September 2003 definéiert déi applicabel Interventiounsketten. Niewent der Interventioun vun der Police an den Dispositiounen zu der Wegweisung beschreift d'Gesetz och d'Rolle vum « Service d'Assistance aux Victimes de Violence Domestique », déi vun den Associatioune Femmes en détresse an INFOMANN geréiert ginn, an déi responsabel si fir d'Berodung vun den Affer, a vum « Service d'assistance prenant en charge les auteurs » deen d'Auteurs en charge hält. An dësem Fall ass dëst de RIICHT ERAUS vum Lëtzebuenger Roude Kräiz.

Des Weideren definéiert d'Gesetz d'Servicer déi sech mannerjäregen Affer unhuelen. Dëst sinn Aufgaben déi de PSYea (Femmes en détresse) an Alternatives (Fondation Pro Familia) iwwerhuelen. Op Grond vum legalen Dispositif kritt all mannerjäregt Affer vun haislecher Gewalt zu Lëtzebuerg gehollef a gëtt de manière obligatoire vun engem vun deenen zwee spezialiséierte Servicer en Charge geholl.

Méi Detailer zu der Unzuel vu Kanner, déi Affer vun haislecher Gewalt gi sinn an déi vu spezifesche Servicer am Kader vun enger Wegweisung an dodriwwer eraus en Charge geholl gi sinn, fannt dir de manière générale am järeliche Bericht¹ vum « Comité de Coopération entre les

¹ <https://mega.public.lu/fr/publications/publications-ministere/2023/rapport-violence-2023.html>



professionnels dans le domaine de la lutte contre la violence»² an um Site vum Observatoire de l'Égalité; am Joer 2023 hunn 937 Mineuren, Affer vun haislecher Gewalt, Hëllef kritt.

Zousätzlech offiziell Zuelen iwwert d'Entwécklung vun der haislecher Gewalt zu Lëtzebuerg stinn am genannte Bericht iwwert haislech Gewalt an ënnert dem Volet "violence domestique" vum Observatoire de l'Égalité.³ Dës Statistiken dokumentéieren d'Evolutioun vun der haislecher Gewalt zu Lëtzebuerg.

Zwee Referenzwäerter sinn essentiell fir dës Entwécklung ze dokumentéieren, dat sinn engersäits Policeinterventiounen an anerersäits d'Wegweisungen:

Joer	Policeinterventiounen	Expulsiounen
2014	876	327
2015	802	242
2016	798	256
2017	715	217
2018	739	231
2019	849	265
2020	943	278
2021	917	249
2022	983	246
2023	1057	246

Dës Zuelen aus dem Rapport Violence vum Joer 2023 ginn op Basis vum Geschlecht vun de betroffenen Affer ventiléiert, déi sexuell Orientéierung vun den Affer gëtt weder an den Datebanke vun der Police, nach an den Donnéeë vun de Justizautoritéiten erfaasst. An deem Kontext kann een ernimmen, dass 90% vun de weggewisene Täter·inne Männer waren an 10% Fraen.

² <https://legilux.public.lu/filestore/eli/etat/leg/memorial/2003/a173/fr/pdf/eli-etat-leg-memorial-2003-a173-fr-pdf.pdf>

³ <https://observatoire-egalite.lu/violence-domestique/>



Déi offiziell Statistike weisen drop hin, datt 75% vun de Fäll vun haislecher Gewalt sech an der Koppel ofspillen, mir schwätzen an deem Fall vu relationeller Gewalt tëschent Mënschen an heterosexuellen a gläichgeschlechtliche Bezéiungen. Eng Indikatioun iwwert Gewalt a gläichgeschlechtliche Koppelen kann een ofleede vun administrativen Donnéeën, déi am Kader vum Rapport Violence erhuewe ginn, notamment d'Bezéiung tëschent dem Täter respektiv der Täterin an dem Affer am Kader vun enger Wegweisung:

- 2/265 Expulsiounen a gläichgeschlechtliche Koppelen am Joer 2019,
- 6/278 Expulsiounen a gläichgeschlechtliche Koppelen am Joer 2020,
- 4/249 Expulsiounen a gläichgeschlechtliche Koppelen am Joer 2021,
- 2/246 Expulsiounen a gläichgeschlechtliche Koppelen am Joer 2022, an
- 0/246 Expulsiounen a gläichgeschlechtliche Koppelen am Joer 2023.

De Kampf géint haislech Gewalt ass eng Prioritéit fir d'Regierung. All Affer kritt onofhängeg vu sengem Geschlecht, senger Genderidentitéit a senger sexueller Orientéierung gehollef an d'Täter·inne gi sanktionéiert. Et besteet e ganz accessibelen Hëllefseréseau an en Dispositif, deem der Diversitéit vun eiser Gesellschaft gerecht gëtt.

Lëtzebuerg, den 04. Februar 2025

D'Ministesch fir Gläichstellung an Diversitéit

(s.) Yuriko Backes